

23 AUG 2002

Mahathir-Pelajar

PELAJAR SEWAJARNYA TAHU MENGHARGAI DAN MENGHAYATI KEMERDEKAAN

JOHOR BAHRU, 23 Ogos (Bernama) -- Datuk Seri Dr Mahathir Mohamad berkata pelajar, sebagai pewaris kepimpinan negara dan penentu kesinambungan tamadun bangsa, sewajarnya tahu menghargai dan menghayati kemerdekaan.

Perdana Menteri berkata mereka perlu turut memberikan sumbangan untuk mengisi dan mempertahankannya serta menyiapkan diri untuk memikul tanggungjawab itu.

"Mereka perlu membuktikan kesetiaan yang tidak berbelah bahagi kepada tanah air," katanya dalam perutusan pada buku cenderamata Perhimpunan Patriotik Pemimpin Pelajar Sekolah peringkat Kebangsaan yang berlangsung di sini, hari ini.

Dr Mahathir dijadual menutup perhimpunan 1,040 pemimpin pelajar dari seluruh negara yang berkumpul di Stadium Perbadanan Pasir Gudang dekat sini, esok.

Sambil menegaskan pelajar merupakan aset negara yang amat penting, Perdana Menteri berkata sebagai pemimpin masa depan, golongan remaja hari ini mesti meletakkan tanggungjawab menuntut ilmu sebagai matlamat utama mereka.

Dr Mahathir berkata hanya dengan ilmu pengetahuan dan kecekapan, Malaysia dapat terus membina satu bangsa dan negara yang berjaya dan disegani.

"Aktiviti masyarakat juga mesti disertai untuk mendekatkan diri dengan situasi masyarakat sebenar. Golongan pelajar mesti peka kepada keadaan di sekeliling mereka," katanya.

Beliau berkata semua itu merupakan elemen penting dalam pembentukan jati diri yang mantap, seterusnya membina kemampuan menangani cabaran dalam usaha merealisasikan Wawasan 2020.

"Justeru itu, gunakanlah kesempatan yang diperolehi daripada perhimpunan ini untuk mempelajari dan meningkatkan ilmu serta kemahiran yang berkaitan dengan kepimpinan," kata Perdana Menteri.

Sementara itu, Menteri Besar Datuk Abdul Ghani Othman dalam perutusannya pula berkata generasi muda bertanggungjawab meneruskan perjuangan mengisi kemerdekaan dan mempertahankan kemerdekaan.

Menteri Pendidikan Tan Sri Musa Mohamad pula berkata patriotisme adalah semangat atau kesanggupan seseorang untuk mempertahankan kedaulatan dan maruah negara serta sentiasa menyokong negara, dasar negara dan pemimpin negara secara berterusan.

"Program ini adalah untuk menyemarakkan semangat kecintaan kepada negara selain menghayati nikmat kebebasan dan kemerdekaan negara," katanya adan menambah program itu dapat merapatkan hubungan di kalangan pemimpin pelajar seluruh negara.

Musa berkata sempena penghayatan Bulan Kemerdekaan ini, Bahagian Sekolah di kementeriannya menganjurkan perhimpunan patriotik itu.

Perhimpunan itu yang bermula Selasa lepas antara lain membawa para peserta menjelajahi daerah-daerah di Johor termasuk ke tempat-tempat bersejarah, menjenguk desa, menjalani aktiviti lasak dan mengikuti ceramah motivasi.

-- BERNAMA

MNY NAK